
PWYLLGOR YMGYNGHOROL HARBWR ABERDYFI DYDD MAWRTH, 12 TACHWEDD 2019

YN BRESENNOL:

Aelodau: Cyng. Anne Lloyd Jones (Cyngor Gwynedd), Cyng. Mike Stevens (Cyngor Gwynedd), Cyng. Bob Tyrrell (Cyngor Tref Aberdyfi), Nick Dawson (Outward Bound Wales), Cyng David Williams (Pwyllgor Gwelliannau a Hysbysebu Aberdyfi), Nigel Willis (Clwb Cychod Aberdyfi) a Desmond George (Clwb Hwyllo Dyfi)

Swyddogion: Arthur Jones (Uwch Swyddog Harbyrau), William A Stockford (Harbwrfeistr Aberdyfi), Lowri Haf Evans (Swyddog Gwasanaethau Democratiaeth) a Mererid Watt (Cyfieithydd)

1. ETHOL CADEIRYDD

PENDERFYNWYD ethol y Cynghorydd Dewi Owen yn Gadeirydd y Pwyllgor hwn am y flwyddyn 2019/20

2. ETHOL IS-GADEIRYDD

PENDERFYNWYD ethol y Cynghorydd Anne Lloyd Jones yn Is-gadeirydd y Pwyllgor hwn am y flwyddyn 2019/20.

3. YMDDIHEURIADAU

Derbyniwyd ymddiheuriadau gan Y Cynghorydd Gareth Thomas (Aelod Cabinet - Economi), Cynghorydd Dewi Owen (Cyngor Gwynedd), LIŷr B Jones Pennaeth Cynorthwyol Economi ac Chymuned a Barry Davies (Rheolwr Morwrol a Pharciau Gwledig)

4. DATGAN BUDDIANT PERSONOL

Dim i'w nodi

5. COFNODION

Llofnododd y Cadeirydd gofnodion cyfarfod y Pwyllgor hwn a gynhaliwyd ar 5ed o Fawrth, 2019, fel rhai cywir.

6. DIWEDDARIAD AR FATERION RHEOLAETHOL YR HARBWR

Adroddiad	yr	Uwch	Swyddog	Harbyrau
-----------	----	------	---------	----------

Cyflwynwyd adroddiad gan yr Uwch Swyddog Harbyrau yn rhoi diweddariad cryno ar faterion yr Harbwr am y cyfnod rhwng Mawrth 2019 a Hydref 2019.

Angorfeydd

Adroddwyd bod nifer yr angorfeydd yn sefydlog er newid ym mhatrwm ymddygiad defnyddwyr. Amlygwyd bod cychod pŵer a beiciau dwr bellach yn fwy poblogaidd na chychod hwylio ac yr un yw'r sefyllfa ar draws y wlad.

Cod Diogelwch

Atgoffwyd yr Aelodau bod yr Asiantaeth Morwrol a Gwylwyr y Glannau wedi cynnal archwiliad ym Mawrth 2019 ar drefniadau penodol a system Harbyrau Bwrdeistrefol Gwynedd er mwyn sicrhau cydymffurfiaeth a'r Cod Diogelwch Morol. Yn dilyn ymweliad pellach i weld sut roedd yr ychwanegiadau a awgrymwyd wedi ei gweithredu, adroddwyd bod Capten Quader (archwilydd o'r Asiantaeth) yn fodlon bod y Gwasanaeth yn cydymffurfio â darpariaethau'r Cod Diogelwch Morol Porthladdoedd. Atgoffwyd yr Aelodau o'u dyletswydd i gyflwyno sylwadau ar addasrwydd y Cod Diogelwch a chyfeirio unrhyw bryderon i'r Harbwrfeistr.

Materion Staffio

Adroddwyd bod Harbwrfeistr Cynorthwyol llawn amser wedi ei benodi ac wedi ei leoli yn Harbwr Aberdyfi. Bydd y penodiad yn sicrhau cefnogaeth i'r harbwrfeistr ynghyd a chynorthwyo mewn harbyrau eraill ar draws y Sir pan fydd angen. Nododd yr Harbwrfeistr bod penodi Mr Oliver Simmonds i'r tîm eisoes wedi profi yn werthfawr a bod ei brofiad o weithio gyda'r Clwb Hwyllo yn fanteisiol. Ategodd yr Aelodau bod cydweithio da ymysg y staff a bod y penodiad yn un da.

Materion Ariannol

Cyflwynwyd cyllideb yr harbwr i amlygu'r sefyllfa ariannol bresennol hyd at ddiwedd Medi 2019. Amcangyfrifwyd tanwariant o £4,121. Amlygwyd bod bwriad o godi ffioedd lansio dyddiol o £10 i £15

Mewn ymateb i gwestiwn ynglŷn â beth sydd wedi ei glustnodi ar gyfer y tanwariant, amlygwyd bod bwriad prynu bwi ynghyd a gwaith cynnal a chadw dros dymor y gaeaf.

(b) Adroddiad yr Harbwr Feistr

Cyflwynwyd adroddiad gan yr Harbwrfeistr yn manylu ar faterion mordwyo, gweithredol a chynnal a chadw. Tynnwyd sylw at y materion canlynol:

- Bod y gwasanaeth yn parhau i fonitro llwybr y sianel fordwyo i Aberdyfi. Nodwyd bod y sianel yn newid yn barhaol gyda symudiad gogleddol. Nodwyd bod hyn yn creu gwaith addasu i gynorthwyo a sicrhau diogelwch mordwyo.
- Bod Ymddiriedolaeth yr Outward Bound a Chlwb Hwyllo Dyfi wedi cynnal rhaglen brysur o ddigwyddiadau llwyddiannus dros yr Haf
- Bod y Gwasanaeth wedi gweld cynnydd mewn nifer carcasau anifeiliaid wedi eu golchi i fyny ar y traeth
- Diolchwyd i'r Ymddiriedolaeth Outward Bound a Chlwb Hwyllo Dyfi am y cymorth a gafodd y Gwasanaeth tra bod gwaith atgyweirio strwythurol ar gwch yr harbwr

- Bod ysgolion tywod pren yn galluogi mynediad ar draws y twyni i'r traeth yn dilyn gwaredu llwybr pren y clwb golff
- Bod sefyllfa'r bont dros y rheilffordd i Fryn Llestair (Picnic Island) yn cael ei drafod a phryderon diogelwch yn cael eu hystyried.
- Bod y Gwasanaeth wedi bod yn cydweithio gyda'r physgotwyr masnachol i dacluso lloc y pysgotwyr. Y bwriad yw cadw offer sydd ddim yn cael ei ddefnyddio yn y lloc a chylchdroi'r offer yn ôl yr angen.
- Bod trafodaethau pellach i'w cynnal gyda Rheolwr Morwrol a Pharciau Gwledig i sicrhau diogelwch cerddwyr ar y cei.
- Bod trafodaethau wedi eu cynnal gydag Uned Eiddo'r Cyngor i gadw'r Swyddfa'r Harbwr yn ei leoliad presennol

Mewn ymateb i gwestiwn ynglŷn â gwaredu anifeiliaid sydd wedi eu golchi i fyny ar y traeth nodwyd bod carcasau anifeiliaid (defaid gan amlaf) yn cael eu gwaredu yn Nolgellau yn unol â threfniadau gwaredu anifeiliaid. Bydd anifeiliaid y môr yn cael eu claddu yn y traeth - os yw yn anifail prin bydd y gwasanaeth yn cysylltu gyda gwasanaeth ymchwil mamaliaid môr er mwyn cofnodi pwysau, math ac ati. Ategwyd bod cydweithio da gyda mudiadau gwirfoddol lleol sydd yn glanhau'r traeth.

Mewn ymateb i sylw am sefyllfa'r bont dros y rheilffordd i Fryn Llestair (Picnic Island) nodwyd:

- Bod y penderfyniad i gau'r bont wedi cael ei gefnogi gan ddefnyddwyr er efallai wedi cael effaith ar weithgareddau Outward Bound
- Bod Ymgynghoriaeth Gwynedd wedi cynnal asesiad strwythurol o'r bont
- Bod amserlen drafft o 12 – 18 mis wedi ei osod ar gyfer symud y bont – bydd angen atgyfnerthu'r rhwystrau atal mynediad
- Bod gan y Cyngor Cymuned gyswllt leol defnyddiol gyda Network Rail - peiriannydd wedi cyfarfod cynghorwyr cymuned a staff Outward Bound ar y safle i drafod y sefyllfa. Amlygwyd bod y cyfarfod wedi bod yn un gwerthfawr ar prif bryderon wedi eu hamlygu.
- Bod angen datrysiad tymor hir a chynllun priodol yn ei le
- Ymddengys 18mis yn gyfnod hir – yn ddelfrydol adeiladu pont newydd i'w gosod mewn un symudiad
- Bod cydweithio gyda Network Rail yn rhan allweddol o'r datrysiad

Mewn ymateb i'r gwaith sydd wedi ei wneud o gwmpas Lloc y Pysgotwyr nodwyd bod y ffens sydd wedi ei godi o amgylch y lloc yn un o ansawdd da, yn uchel i atal tipio slei bach ac wedi ei gloi. Croesawyd y gwaith caled oedd wedi ei wneud i dacluso'r ardal a gofynnwyd am gefnogaeth gan y gymuned i gadw'r ardal yn daclus. Yn dilyn trafodaethau gyda'r pysgotwyr, amlygwyd bod oddeutu hanner yr offer pysgota wedi ei drosglwyddo o'r harbwr i'r lloc. Ategwyd mai'r bwriad yw cylchdroi'r offer sydd yn cael ei ddefnyddio gan storio unrhyw offer arall yn y lloc. Bydd offer sydd wedi torri neu offer diangen yn cael ei wared.

Sylwadau pellach:

- Bod yr harbwr yn un gweithredol, yn denu llawer o ddiddordeb ymysg ymwelwyr ac yn rhan bwysig i economi a diwydiant yr ardal
- Bod angen sicrhau bod y safle yn cael ei gynnal a'i gadw yn rheolaidd
- Bod angen cydweithio gyda'r pysgotwyr masnachol - dyma eu bywoliaeth

Mewn ymateb i sylw ynglŷn â safle swyddfa'r harbwrfeistr amlygwyd yr

angen i uwchraddio'r swyddfa er lles y staff. Ategwyd nad oedd y cyfleusterau yn ddigonol. Cytunwyd bod lleoliad y swyddfa yn addas, ond yn ddelfrydol bod angen swyddfa gydag ail lawr i wella gweledd ar draws yr harbwr a'r aber. Yn y cyfamser cynigwyd gosod teledu cylch cyfyng fel datrysiad. Awgrymwyd defnyddio swyddfeydd sydd ar osod gan Uned Eiddo'r Cyngor sydd wedi eu lleoli gerllaw yr Harbwr ar gyfer cyfleusterau toiled.

Mewn ymateb i'r digwyddiadau a gynhaliwyd, gwnaed sylw bod digwyddiad Nofio Aberdyfi yn un sydd wedi ei drefnu yn dda gyda'r trefnwyr yn rhoi ystyriaeth deg i ddiogelwch yr harbwr. Er bod y trefnwyr yn barod iawn i gydymffurfio gyda mesurau diogelwch, teimlwyd bod modd cynnal trafodaethau pellach i wella'r trefniadau.

Ategwyd bod digwyddiad elusenol 'Watercrat Blackrock Blast' wedi codi hyd at £10k ar gyfer Ambiwlans Awyr. Nodwyd bod oddeutu 100 o feiciau dwr wedi cymryd rhan a bod gwaith da wedi ei wneud i hyrwyddo diogelwch yn y dŵr.

Diolchwyd i bawb am eu hymroddiad i gynnal a threfnu digwyddiadau

PENDERFYNWYD derbyn yr adroddiadau.

7. MATERION I'W HYSTYRIED AR GAIS AELODAU'R PWYLLGOR YMGYNGHOROL

(a) Cynllun Cei Aberdyfi

Ar gyfer adnewyddu'r wal, adroddwyd bod Llywodraeth Cymru wedi cymeradwyo'r cais mewn egwyddor a'r cynllun bellach wedi ei restru ar Gynllun Asedau'r Cyngor. Amlygwyd bod y Cyngor wedi cadarnhau bod arian cyfatebol wedi ei glustnodi a manylion pellach ar y Cynllun Busnes Llawn wedi ei gyflwyno i Lywodraeth Cymru. Bydd y gwaith yn mynd allan am dendr yn ystod y flwyddyn ariannol 2019/20 gyda'r dogfennau tendr a methodoleg asesu tendr wedi eu cwblhau. Y bwriad yw penodi contractwr cyn Mawrth 31ain 2020 i ddechrau'r gwaith yn Medi 2020 (gan osgoi tymor yr Haf) a chwblhau'r gwaith erbyn Pasg 2021. Ategwyd y byddai cyfarfod cyhoeddus yn cael ei drefnu i rannu gwybodaeth gyda busnesau lleol a'r gymuned, cyn i'r gwaith ddechrau.

Derbyniwyd hyn fel newyddion calonogol iawn. Canmolwyd y cynlluniau a chroesawyd bod yr arian wedi ei sicrhau. Awgrymwyd y dylid gwahodd y contractwr llwyddiannus i'r cyfarfod cyhoeddus fel bod modd adeiladu perthynas agored gyda'r gymuned leol. Ategwyd bod llawer o waith angen ei wneud i sicrhau llwyddiant y cynllun gyda chais i bawb fod yn gefnogol.

- Awgrymwyd uwchraddio swyddfa'r harbwrfeistr yn ystod y cyfnod – cyfle rhy dda i'w gollu
- Angen sicrhau bod y contractwr yn cysylltu a chydweithio gyda'r Bad Achub a'r pysgotwyr masnachol

Mewn ymateb i'r sylw am uwchraddio'r swyddfa, nodwyd bod yr Uned Eiddo yn ymwybodol o'r sefyllfa ac felly bod modd cynnal trafodaethau.

(b) Diogelwch Cei Aberdyfi

Yn dilyn damwain ddiweddar ar y cei, amlygwyd y bwriad o beidio defnyddio'r ardal fel man parcio ond fel safle llwytho a dadlwytho yn unig. Y dymuniad yw peidio caniatáu cerbydau i barcio ar y cei fel bod modd osgoi gwrthdrawiad gyda cherddwyr.

8. DYDDIAD CYFARFOD NESAF

Nodwyd, yn swyddogol, mai dyddiad y cyfarfod nesaf yw Mawrth 3ydd 2020. Er hynny, derbyniwyd cynnig am geisio dyddiad arall fel bod modd derbyn diweddariad ar dendr gwaith y cei. Gwnaed cais i'r Swyddog Gwasanaethau Democrataidd drafod y cynnig gyda'r Gwasanaeth Morwrol.

Dechreuodd y cyfarfod am 10.30 y.b. a daeth i ben am 11.50 y.b.

CADEIRYDD